

ფისკალური დეცენტრალიზაციის კანონზომიერებანი და
ეკონომიკურ გარემოზე ფისკალური პოლიტიკის გავლენის
თეორიული ასპექტები

**Regulation of fiscal decentralization and theoretical aspects of fiscal
policy influence on economic environment**

ნათია ახალკაცი – დოქტორანტი

საქართველოს ტექნიკური უნივერსიტეტი

მერაბ ვანიშვილი – ეკონომიკის დოქტორი, პროფესორი

საქართველოს ტექნიკური უნივერსიტეტი

Natia Akhalkatsi, PhD student

Georgian Technical University

Merab Vanishvili – PhD, Professor

Georgian Technical University

რეზიუმე: წინამდებარე სტატია მიზნად ისახავს წარმოადგინოს, ერთი მხრივ, ფისკალურ-ი დეცენტრალიზაციის თავისებურებანი საქართველოში; მეორე მხრივ კი, ასახოს ფისკალური პოლიტიკის ეკონომიკურ გარემოზე გავლენის თეორიული ასპექტები, საერთაშორისო კვლევების შედეგები და გამოცდილება ფისკალური პოლიტიკის გავლენისა და გასათვალისწინებელი რისკების კუთხით მოკლე- და გრძელვადიან პერიოდში. დასახული მიზნის შესაბამისად, სტატიის პირველი ნაწილი ეხება ფისკალური დეცენტრალიზაციის პრობლემებსა და მათი დამლევის გზებს საქართველოში; მეორე ნაწილი კი ასახავს ფისკალური პოლიტიკის გავლენის თეორიულ ასპექტებს მოკლე- და გრძელვადიან პერიოდში, ემპირიული კვლევებისა და საერთაშორისო გამოცდილების მოკლე მიმოხილვას ფისკალური პოლიტიკის, როგორც მაკროეკონომიკური სტაბილიზაციის ინსტრუმენტის, გამოყენების შედეგებზე.

Abstract: The present article aims to present the peculiarities of fiscal decentralization in Georgia on one hand; On the other hand, to reflect the

theoretical aspects of fiscal policy on fiscal policy, the results of international research and the experience of fiscal policy influencing and taking into consideration the short-term and long-term. According to the aim set, the first part of the article deals with the problems of fiscal decentralization and ways to overcome them in Georgia; The second part reflects the theoretical aspects of fiscal policy influence in the short and long term, the brief overview of empirical research and international experience on the use of fiscal policy as a macroeconomic stabilization instrument.

საკვანძო სიტყვები: ბანკი, ეკონომიკა, საბანკო სისტემა, ევროპული საბანკო მოდელი, ამერიკული საბანკო მოდელი

Key Words: Bank, Economy, Banking system, European banking model, American banking model

შესავალი: სახელმწიფოში თვითმმართველობის აქტივიზაცია ორ ძირითად მიზანს ემსახურება: საჯარო ხელისუფლების დეცენტრალიზაციისა და დეკონცენტრაციის ბა-ლანსი სახელმწიფოში, ერთი მხრივ, მმართველობის ურთიერთქმედების სტანდარტს და შესაბამის შედეგს განაპირობებს, მეორე მხრივ კი, მოსახლეობის ინტერესებთან ხელისუფლების ზემდგომი ინსტანციების საქმიანობის დაახლოებასა და ადგილობრივი ინიციატივის საჯარო ინტერესებთან შერწყმას უზ-რუნველყოფს¹.
ძირითადი ტექსტი: დეცენტრალიზაცია სამ - პოლიტიკურ, ადმინისტრაციულ და ფისკალურ - კომპონენტს მოიცავს: პოლიტიკური დეცენტრალიზაცია ნიშნავს ადგილობრივ დონეზე

¹ ადგილობრივი თვითმმართველობის ეკონომიკური საფუძვლები უზრუნველყოფს მის სამეურნეო საქმიანობას და ემსახურება თვითმმართველი ერთეულის მოსახლეობის მოთხოვნილებათა დაკმაყო-ფილებას. ამასთან, მისი განმტკიცება და განვითარება გავლენას ახდენს ქვეყანაში არსებულ მდგომა-რეობაზე მთლიანად.

წარმომადგენლობითი ორგანოების არჩევას და ამ წარმომადგენლობითი ორგანოებისთვის, მათი კომპეტენციების ფარგლებში, პოლიტიკურ და საკანონმდებლო გადაწყვეტილებათა მიღების უფლების მინიჭებას. *ადმინისტრაციული დეცენტრალიზაცია* გულისხმობს თვითმმართველობის ორგანოებისთვის ფართო უფლებამო-სილებათა გადაცემას, მათ შორის, სახელმწიფო საქმეების მართვისა და საჯარო მომსახურების სფეროში. *ფისკალური დეცენტრალიზაცია* თვითმმართველობისთვის კომპეტენციათა განსახორციელებლად აუცილებელი ფინანსური რესურსების განკარგვის უფლების გადაცემას გულისხმობს.

უფრო კონკრეტულად, ფისკალური დეცენტრალიზაცია ხელისუფლების დონეებს შორის სახელმწიფო ხარჯების მართვის უფლებათა განაწილება, მათ შორის, ადგილობრივი თვითმმართველობის ორგანოებისთვის საკუთარი ბიუჯეტების განკარგვისა და გადასახადების შემოღების უფლებათა მინიჭებაა.

ფისკალური ჩარჩო შეიძლება განისაზღვროს, როგორც ინსტიტუციური პოლი-ტიკის შექმნა, რომელიც აყალიბებს ფისკალურ პოლიტიკას ეროვნულ დონეზე. იგი აერთიანებს გარკვეულ ღონისძიებებს, პროცედურებს და საბიუჯეტო პოლიტიკის დაგეგმვისა და დანერგვაზე პასუხისმგებელ ინსტიტუტებს.

შიდა ფისკალური ჩარჩოს ძირითადი კომპონენტებია: ძირითადი ფისკალური წესები; დამოუკიდებელი ფისკალური ინსტიტუტები; საბიუჯეტო პროცედურები, რის მიხედვითაც ხორციელდება ბიუჯეტის მომზადება, დამტკიცება და დანერგვა; ხარჯების საშუალოვადიანი დაგეგმვა მრავალწლიანი საბიუჯეტო დაგეგმვისთვის გამოიყოფა ცალკე, როგორც ფისკალური პოლიტიკის საშუალოვადიანი დაგეგმვის მნიშვნელოვანი საფუძველი.

ზემოაღნიშნულის მისაღწევად ფისკალური წესების დანერგვა მნიშვნელოვანია, რათა შემცირდეს პოლიტიკის განმსაზღვრელი პირების მიერ პროციკლური პო-ლიტიკა, ფისკალური დაგეგმვა იყოს გრძელვადიან შედეგებზე ორიენტირებული და თავიდან იქნეს არიდებული მოკლევადიან შედეგებზე გათვლილი პოლიტიკა. ამას-თან, ფისკალური მართვა მთავრობის სხვადასხვა დონეებს შორის უკეთესი კოორდი-ნაციის საშუალებას იძლევა.

ფისკალური დეცენტრალიზაციის უმთავრესი პირობა ის არის, რომ ადგილობ-რივი თვითმმართველობის ორგანოებს ჰქონდეს ადგილობრივი გადასახადებისა და მოსაკრებლების შემოღების უფლება (როგორც მომსახურებაზე, ასევე სხვადასხვა სახის ნებართვების გაცემაზე). თუმცა, ისიც ნიშანდობლივია, რომ ძალზე მაღალი გადასახადები მმართველ პარტიას ამომრჩეველთა ხმების დაკარგვით ემუქრება.

ფისკალური დეცენტრალიზაციის უმთავრესი დანიშნულება არის თვითმმარ-თველობის ორგანოების საკუთარი კომპეტენციის გასატარებლად აუცილებელი ფი-ნანსური რესურსებით უზრუნველყოფა. ადგილობრივი თვითმმართველობა მაშინ არის ეფექტიანი, როცა იგი, უფლებებსა და პასუხისმგებლობასთან ერთად, მნიშვნე-ლოვან რესურსებსაც ფლობს.

თვითმმართველობის განვითარებისთვის ადგილობრივი ბიუჯეტის მნიშვნე-ლოვანი ნაწილი ადგილობრივი გადასახადებიდან უნდა შემოდიოდეს. იმ შემთხვე-ვაში, თუ ადგილობრივი გადასახადები არ იქნება საკმარისი თვითმმართველობის უფლებამოსილებათა განსახორციელებლად, ცენტრალური ხელისუფლება გამოიყე-ნებს მიზნობრივი და გამოთანაბრებითი ტრანსფერების (გრანტების) ინსტიტუტს, რათა

უზრუნველყოს ცხოვრების თანაბარი პირობები და საჯარო მომსახურების მაღალი ხარისხი მთელი ქვეყნის მასშტაბით.

ფისკალური დეცენტრალიზაცია რთული პროცესია საქართველოსთვის და მას გარკვეული წინააღმდეგობები ახლავს, კერძოდ:

- მმართველობის ძველი პრაქტიკა და წარსულის ინერცია, რომელიც მენ-ტალობასთან და ძველი ინსტიტუტების დაბალ ეფექტიანობასთან არის დაკავშირებული;

- ხელისუფლების სხვადასხვა დონეს შორის კონსტრუქციული ურთიერთობის ნაკლებობა;

- თვითმმართველობას ესაჭიროება მოქმედების თავისუფლება, რაც ნიშნავს ადგილობრივი თვითმმართველობის უფლებას - ცენტრალური ხელისუფლების ნე-ბართვის გარეშე მიიღოს გადაწყვეტილება კონკრეტულ პრობლემებზე;

- აუცილებელია ფისკალური დეცენტრალიზაციის გაღრმავება, რაც მხოლოდ ფინანსური რესურსების გადაცემას კი არ უნდა ნიშნავდეს, არამედ მიზნად ისახავდეს ადგილობრივი ბიუჯეტების, გადასახადების და ფინანსების სფეროში ადგილობრივი თვითმმართველობის უფლებამოსილების გაზრდას;

- ასევე აუცილებელია შესაბამისი ქონების სხვა მატერიალური რესურსების გადაცემა ადგილობრივი თვითმმართველობისთვის.

ქართული სახელმწიფო აშკარად საჭიროებს ხელისუფლების სხვადასხვა დონეს შორის ვერტიკალური და ჰორიზონტალური კავშირების არსებობას. აუცილებელია არსებობდეს ვერტიკალური

კოორდინაცია ხელისუფლების სხვადასხვა - ნაციო-ნალურ, რეგიონულ და ადგილობრივ - დონეებს შორის².

თვითმმართველობის ორგანოებს მთელი ქვეყნის მასშტაბით უნდა ჰქონდეთ ჰორიზონტალური კოორდინაცია, რაც უზრუნველყოფს საერთო სტანდარტების, ურთიერთმხარდაჭერის და საუკეთესო პრაქტიკის გაზიარების შესაძლებლობას. ჰორიზონტალური კოორდინაცია ასევე გამოყენებული უნდა იქნეს ცენტრალურ ხელისუფლებასთან თანამშრომლობაში, რათა უზრუნველყოფილ იქნეს წარმატება.

ფისკალური დეცენტრალიზაციის მთავარი პრინციპებია:

- სამართლიანობა და თანაბარუფლებიანობა ეროვნული დოვლათის შექმნასა და განაწილებაში;
- ანგარიშგება მოსახლეობის მიმართ, რათა გარანტირებული იქნეს საჯარო ფუ-ლის ხარჯვა საზოგადოების ინტერესების შესაბამისად;
- მოქალაქეთა მონაწილეობა საბიუჯეტო პროცესში, რაც საშუალებას აძლევს მო-სახლეობას - გავლენა მოახდინოს ადგილობრივი ხელისუფლების გადაწყვე-ტილებებზე;
- ტექნიკური დახმარება ადგილობრივი ხელისუფლებისათვის, რათა მან შეი-ძინოს ფინანსური რესურსების მართვის ცოდნა და გამოცდილება;
- საბიუჯეტო დანახარჯების ოპტიმიზაცია ხარისხიანი და იაფი საჯარო მომ-სახურების მისაღწევად.

ფისკალური დეცენტრალიზაციის პრინციპების რეალიზაციის საფუძველია გამართული და სისტემური საკანონმდებლო ბაზის შექმნა, სადაც ნათლად იქნება განსაზღვრული ხელისუფლების

² მაგალითად, ადგილობრივ დონეზე მშენებლობის ნებართვის გაცემა კოორდინირებული უნდა იქნეს მიწის მართვის ეროვნულ პოლიტიკასთან.

თითოეული რგოლის საბიუჯეტო და ფისკალური უფლებამოსილებანი.

ლიბერალურ და დემოკრატიულ სახელმწიფოებში ადგილობრივი თვითმმართველობის ორგანოებს ორი ფუნქცია ენიჭება: 1. *სერვისების მიწოდება*: ყოველდღიური საჭიროებების (ადმინისტრირება ადგილობრივ დონეზე, კომუნალური სამსახურები, საყოფაცხოვრებო პრობლემების მოგვარება, მინიმალური სოციალური გარანტიები) დაკმაყოფილება ბევრად უფრო ეფექტურად ხორციელდება ადგილობრივი თვითმმართველობების მიერ³. 2. *მოსახლეობასთან სიახლოვე*: ცენტრალური ხელისუფლებისაგან განსხვავებით, ადგილობრივი თვითმმართველობა ყოველდღიურ შეხებაშია მოქალაქეებთან და გამოხატავს უშუალოდ მათ ინტერესებს⁴.

საქართველოში არსებული მაკროეკონომიკური ტენდენციების, კერძოდ, კი საგარეო და შიდა ფაქტორების გავლენით გაცვლითი კურსის გაუფასურებისა და ინფლაციური რისკების ზრდის გათვალისწინებით, მონეტარული პოლიტიკის გამ-კაცრების პარალელურად, არსებითი გახდა მთავრობის მიერ ფისკალური პოლიტიკის გადახედვის საკითხი. კერძოდ, დისკუსიის მთავარ ასპექტად იქცა ფისკალური პოლიტიკის მოსალოდნელი

³ საერთაშორისო პრაქტიკა გვიჩვენებს, რომ სწორედ ამ გზით მიიღწევა მომსახურების მიწოდების რო-გორც ეფექტურობის (სწორი საქმის კეთება), ისე ეფექტიანობის მაღალი ხარისხი.

⁴ მაგალითად, თუ ცენტრალური ხელისუფლების ხელმძღვანელებთან ყოველდღიურ შეხვედრა რიგი-თი მოქალაქისათვის შეუძლებელია, მას შეუძლია მუდმივი კონტაქტი იქონიოს მის მიერვე არჩეული ადგილობრივი თვითმმართველობის წარმომადგენლებთან, აკონტროლოს ამ უკანასკნელთა საქმია-ნობა და უშუალოდ ჩაერთოს გადაწყვეტილების მიღების პროცესში.

მიმართულება: არსებული ფისკალური პოლიტიკის გამკაცრების შესაძლებლობა, რაც გულისხმობს სახელმწიფო დანახარჯების შემცირებას ან/და გადასახადების ზრდას, ან პირიქით, პოლიტიკის შემსუბუქება, რაც გულისხმობს სახელმწიფო დანახარჯების ზრდას ან/და გადასახადების შემცირებას.

ზემოაღნიშნულის გათვალისწინებით, ჩვენი სტატია მიზნად ისახავს წარმო-ადგინოს, ერთი მხრივ, ფისკალური პოლიტიკის ეკონომიკურ გარემოზე გავლენის თეორიული ასპექტები; მეორე მხრივ, კი ასახოს საერთაშორისო კვლევების შედეგები და გამოცდილება ფისკალური პოლიტიკის გავლენისა და გასათვალისწინებელი რისკების კუთხით მოკლე- და გრძელვადიან პერიოდში.

ფისკალური პოლიტიკის ძირითად მაკროეკონომიკურ პარამეტრებზე მოსა-ლოდნელი გავლენის შეფასება, განსაკუთრებით ფისკალური პოლიტიკის, როგორც მაკროეკონომიკური სტაბილიზაციის ინსტრუმენტის გამოყენების მიზანშეწონილობისა და ეფექტიანობის კუთხით, როგორც ეკონომიკურ თეორიაში, ასევე პრაქტიკაში განსხვავებული საერთაშორისო გამოცდილების გათვალისწინებით, დებატების საგანია. აქ განსაკუთრებით ყურადსაღებია ორი მომენტი: ერთი მხრივ, მნიშვნელოვანია დისკრეციული ფისკალური პოლიტიკის, როგორც ეკონომიკური სტაბილიზაციის ინსტრუმენტის გავლენა მოკლე- და გრძელვადიანი პერიოდისთვის, ასევე მონეტარული პოლიტიკის განსხვავებულ მიმართულებებთან კოორდინაციისას. მეორე მხრივ, საყურადღებოა, დისკრეციული ფისკალური პოლიტიკის ეფექტიანობის კავშირი მის კომპოზიციასთან (ანუ იმ ინსტრუმენტებთან, რომლებზეც ხდება ფოკუსირება პოლიტიკის შესაბამისი მიმართულების განხორციელებისას).

მოკლევადიან პერიოდში, ფისკალური პოლიტიკის ცვლილება ეკონომიკურ გარემოზე ზეგავლენას ძირითადად საქონელსა და მომსახურებაზე შინამეურნეო-ბეზის, ბიზნესის და მთავრობის მოთხოვნაზე ცვლილების არხით ახდენს, რაც, თავის მხრივ, ზემოქმედებს გამოშვებაზე (მშპ-ზე) პოტენციურ გამოშვებასთან⁵ მიმართებით. ასე მაგალითად, ექსპანსიური ფისკალური პოლიტიკა (გადასახადების შემცირება ან/და სახელმწიფო ხარჯების ზრდა) ზრდის ერთობლივ მოთხოვნას, რაც წარმოების და დასაქმების ზრდის სტიმულს ქმნის ბიზნესისათვის. ერთობლივ მოთხოვნასა და გამოშვებაზე საპირისპირო ეფექტი აქვს მკაცრ ფისკალურ პოლიტიკას (გადასახადების ზრდა ან/და სახელმწიფო ხარჯების შემცირება).

გრძელვადიან პერიოდში კი ფისკალური პოლიტიკის პოტენციურ მშპ-ზე გავლენა შემდეგ არხებს უკავშირდება: სახელმწიფოს ვალის ოდენობის ცვლილება, ფი-ზიკური პირებისა და ბიზნესის სტიმულების ცვლილება მუშაობასთან, დანაზოგებ-თან და ინვესტიციების განხორციელებასთან დაკავშირებით და ასევე სახელმწიფოს ინვესტიციების ცვლილება, რომელსაც, თავის მხრივ, გავლენა აქვს სამუშაო ძალისა და კერძო კაპიტალის მწარმოებლურობაზე.

ზემოაღნიშნულის გათვალისწინებით, ცალკეული კვლევების მიხედვით, ფის-კალური პოლიტიკის ცვლილება გულისხმობს კომპრომისს გრძელ- და მოკლევადიან პერიოდში მშპ-ზე გავლენასთან დაკავშირებით. კერძოდ, ფისკალურ პოლიტიკაში უმეტეს ცვლილებებს, რომელსაც ხელსაყრელი ეკონომიკური

⁵ გამოშვების მაქსიმალური ოდენობა, რაც ეკონომიკას შეუძლია აწარმოოს რესურსების მაქსიმალური უტილიზაციის პირობებში.

გავლენა აქვს მოკლე-ვადიან პერიოდში, გრძელვადიან პერიოდში გამოშვებაზე უარყოფით გავლენას ახდენს.

აღნიშნული ფენომენის მიზეზად მოიაზრება ის ფაქტი, რომ ექსპანსიური ფის-კალური პოლიტიკა (სახელმწიფო ხარჯების ზრდა ან გადასახადის განაკვეთის შემცირება) მოკლევადიან პერიოდში განაპირობებს მოთხოვნაზე ზრდას, რომელიც, თავის მხრივ, გამოშვებას და შემოსავალს ზრდის და, შესაბამისად, საგადასახადო შემო-სავლებს, მაგრამ, როგორც წესი, არა იმ მასშტაბით, რომ განეიტრალებულ იქნას დე-ფიციტის ზრდა. შესაბამისად, აღნიშნული პოლიტიკა სახელმწიფოს ვალს ზრდის, რაც, თავის მხრივ, ამცირებს დანაზოგებსა და კაპიტალის მარაგს და შესაბამისად გამოშვებას (სხვა თანაბარ პირობებში). თუმცა გარკვეულ პირობებში, მოკლე- და გრძელვადიან პერიოდებს შორის აღნიშნული ალტერნატივის თავიდან აცილება შესაძლებელია⁶.

რაც შეეხება გავლენას მოკლევადიან პერიოდში, ზემოაღნიშნული თეორიული ასპექტების გათვალისწინებით, როგორც წესი, მიიჩნევა, რომ ანტიციკლურ დისკრე-ციულ ფისკალურ პოლიტიკას, რაც გულისხმობს ერთობლივი მოთხოვნის ზრდის ხელშეწყობას ეკონომიკური აქტივობის შენელებისას და ერთობლივი მოთხოვნის შეზღუდვას ეკონომიკური ბუმის დროს, მნიშვნელოვანი როლი შეიძლება ჰქონდეს მაკროეკონომიკური სტაბილიზაციის მიზნებისათვის.

თუმცა, არსებობს გარკვეული შემთხვევები, როდესაც ანტიციკლური ფისკალური პოლიტიკის განხორციელება

⁶ აღნიშნულს ადგილი აქვს მხოლოდ იმ შემთხვევაში, თუ ფისკალური პოლიტიკის ცვლილება, რომელიც მოკლევადიან პერიოდში ზრდის ერთობლივ მოთხოვნას, ასევე პოზიტიურად იმოქმედებს ეკონომიკის გრძელვადიან პოტენციალზე, რათა განეიტრალებულ იქნას სახელმწიფო ვალის ზრდის უარყოფითი ეფექტები.

(მაგალითად, სახელმწიფო ხარჯების ზრდა ეკონომიკური აქტივობის შენელებისას) ეკონომიკური აქტივობის შემცირებისას მიზან-შეწონილად არ მიიჩნევა. მაგალითად, ცალკეული კვლევების მიხედვით, ფისკალური პოლიტიკის შერბილება შესაძლებელია შეუსაბამო იყოს დიდი საგარეო დისბალანსის არსებობის დროს. ასეთ დროს, იმ შემთხვევაშიც კი, თუ ეკონომიკური აქტივობა შენელებულია, შესაძლებელია აუცილებელი გახდეს ფისკალური კონსოლიდაცია ზრდადი ინფლაციის შეზღუდვისა ან/და მიმდინარე ანგარიშის დისბალანსის შემცირების ან კაპიტალის არსებითი გადინების დასაძლევად.

ამასთან, სტანდარტული კეინზიანური თეორიის საპირისპიროდ (რომლის მიხედვითაც ფისკალური გამკაცრება აისახება ერთობლივ მოთხოვნაზე, ხოლო ერთობლივი მოთხოვნის შემცირება ეკონომიკურ ზრდას შეამცირებს და უმუშევრობას გაზრდის, სულ მცირე მოკლევადიან პერიოდში) არსებობს მოსაზრებები, რომ ფისკალურ გამკაცრებას შეუძლია სახელმწიფო ვალის შემცირების შედეგად საპროცენტო განაკვეთებზე „სანდოობა“ გაზარდოს, რაც რისკის პრემიუმს შეამცირებს და ინვესტირების მოლოდინებს გაზრდის. აღნიშნულის შედეგი კი შეიძლება იყოს კერძო ინვესტიციების მოზიდვა ("crowding in"), რომელიც დააკომპენსირებს ერთობლივი მოთხოვნის კლებას, რომელიც მთავრობის ხარჯების შემცირების და გადასახადების ზრდის შედეგია. ამდენად, ასეთ შემთხვევაში ფისკალურმა კონსოლიდაციამ შესაძლოა მოკლევადიან პერიოდში გამოშვების ზრდა და არა შემცირება გამოიწვიოს.

დასკვნები: ამრიგად, ჩვენი სტატიის პირველი ნაწილი ეხება ფისკალური დეცენტრალიზაციის პრობლემებსა და მათი დაძლევის გზებს საქართველოში; მეორე ნაწილი კი ასახავს ფისკალური პოლიტიკის გავლენის თეორიულ ასპექტებს მოკლე- და გრძელ-

ვადიან პერიოდში, ემპირიული კვლევებისა და საერთაშორისო გამოცდილების მოკლე მიმოხილვას ფისკალური პოლიტიკის, როგორც მაკროეკონომიკური სტაბილიზა-ციის ინსტრუმენტის, გამოყენების შედეგებსა და აღნიშნული შედეგების კავშირზე განხორციელებული პოლიტიკის ძირითად მახასიათებლებთან.

გამოყენებული ლიტერატურა:

1. ადგილობრივი თვითმმართველობის ინსტიტუციური მოწყობა/ავტორი ა. სვანიშ-ვილი. - თბ., 2009.
2. გოცირიძე ლ., ვანიშვილი მ. შედეგზე ორიენტირებული ბიუჯეტირება: არსი, თავისებურებანი, მექანიზმი //ეკონომიკა. თბილისი, 2011, #7-8,
3. ვანიშვილი მ., ბადაგაძე ი., მუნიციპალური საბიუჯეტო სისტემა და ფინანსური მენეჯმენტი. – თბილისი: ტექნიკური უნივერსიტეტი, 2006.
4. ვანიშვილი მ., ვანიშვილი ნ., საჯარო ფინანსები თბ., 2017.
5. მახარობლიშვილი გ., გოცირიძე ლ., ვანიშვილი მ. ფისკალური დეცენტრალიზა-ციის პრობლემები საქართველოში // საერთაშორისო სამეცნიერო-პრაქტიკული კონფერენციის მასალები. ბათუმი, 16-17 აპრილი, 2010 წ. თბილისი: უნივერსალი, 2010, გვ. 361-365.